

Penurunan nilai ringgit dipengaruhi sentimen - Nazir Razak
Astro Awani
Ogos 20, 2015

KUALA LUMPUR: Sebahagian nilai ringgit dipengaruhi sentimen yang berlaku di dalam negara ketika ini.

Menurut pengerusi CIMB Group, Datuk Seri Nazir Razak, pakar ekonomi di bank berkenaan menilai ringgit pada sekitar 3.70 berbanding dolar.

"Pakar ekonomi CIMB berkata kadar tukaran ringgit harus berada pada paras sekitar RM3.70 (berbanding dolar Amerika).

"Jadi jika pakar ekonomi kami betul, ini bermakna ringgit dinilai lebih rendah sebanyak kira-kira 10 peratus, yang mungkin disebabkan oleh sentimen."

Tambah Nazir, komen dan spekulasi negatif berkenaan keadaan isu domestik tidak akan membantu meningkatkan nilai ringgit.

"Di Malaysia di mana ekonomi dan pasarnya sangat terbuka, kita ada pelabur dari seluruh dunia. Ramai pelabur ini apabila mereka mendengar senario politik Malaysia kini, mereka bertanya mengapa mereka perlu terlibat, jadi mereka pergi ke negara-negara lain. Jadi ini menyebabkan pergerakan keluar modal yang boleh menyebabkan nilai ringgit turun dengan lebih cepat," kata Nazir.

Katanya lagi, nilai ringgit ketika ini sebahagian besarnya dipengaruhi cabaran dalam ekonomi global semasa termasuk harga minyak dan semakan turun yuan.

Nazir menambah, tindakan kerajaan untuk mendapatkan situasi ekonomi sebenar semasa menerusi perbincangan dengan penganalisis dan peniaga adalah satu perkara yang positif.

Tambahnya, ini penting untuk memastikan kerajaan mendapat maklumat penuh sebelum merangka polisi dan mewujudkan penyelesaian kepada situasi berkenaan ringgit ketika ini.

© 2015 Astro Awani Network Sdn. Bhd. (535275-D) All Rights Reserved.

Source: <http://www.astroawani.com/berita-bisnes/penurunan-nilai-ringgit-dipengaruhi-sentimen-nazir-razak-70602>